

POPERA GA PIRIPUWA YEXMAGÜXÜ GA YAXÖGÜXÜTANÜWA NAMUXÜ GA PAURU

Pauru rü nüxü narümoxe ga yema yaxögüxü ga Piripuwa yexmagüxü

¹ Pa Toeneëgü ya Piripuwa Ngëxmagüxex, choma i Pauru rü namaã i taeneë i Timutéu nixi i pexcèx tanaxümatüxü i ñaã popera. Rü toma rü Ngechuchu ya Cristuarü puracütanüxü tixigü. Rü pexcèx tanaxümatü i pema i yaxögüxüärü äëxgacügü na pixigüxü, rü pema i tupaucawa ngüxëetaeruügü na pixigüxü, rü guxãma i pema i Ngechuchu ya Cristuaxü yaxögüxe. ² Rü chanaxwëxe i Tanatü ya Tupana rü törü Cori ya Ngechuchu ya Cristu poraäcü pexü narüngüxëë rü pexü nataäëxëë.

Pauru rü yema yaxögüxüçèx nayümüxë

³ Rü guxüguma i ngëxguma pexna chacuèxächigu rü Tupanana moxë chaxã i pexcèx. ⁴ Rü ngëxguma chayümüxëgux, rü guxüguma chataäëäcüma pexcèx chayümüxë i guxãma i pemax. ⁵ Erü pema rü noxritama Tupanaärü orexü pexinüëgumama rü poraäcü choxü perüngüxëë na nüxü chixuxüçèx i norü ore i mexü. Rü ñuxma rü ta choxü perüngüxëëgüecha. ⁶ Rü Tupana rü marü inanaxügü i wüxi i mexü i puracü i perü maxüwa. Rü nüxü chacuèx rü nüma rü guxügutáma nanaxüecha i ngëma puracü ñuxmatáta yanguxëëä

i ngëxguma ínanguxgu ya Ngechuchu ya Cristu. ⁷ Rü aixcüma name na ngëmaäcü pemaã nagu charüxínüxü, erü poraäcü pexü changechaü rü aixcüma Tupana wüxigu tüxü narüngüxëë i guxâma i yixema. Rü woo ñuxma na chapoxcuxü rü éxna ega äëxgacügüpëxewa choxü nagagügu, rü Tupana choxü narüngüxëë i ngëxguma norü ore i mexüetüwa chideaxgu rü namaã nüxü chixuxgu i äëxgacügü na aixcüma yïixü i ngëma orewa nüxü iyarüngauxü i tórü maxü i taguma gúxü. Rü nüxü chacuèx rü ngëma choxü nangüxëëxüäcüma, rü pexü rü ta narüngüxëë. ⁸ Rü Tupana nüxü nacuèx na ñuxäcü poraäcü pexü chadauxchaüxü rü pexü na changechaüxü i guxâma i pemax, ngëma Ngechuchu ya Cristu pexü na ngechaüxürü. ⁹ Rü chorü yumüxëwa naxcèx íchaca na yexeraäcü pegü pengechaügüxüçèx rü Tupanaxü pengechaügüxüçèx. Rü naxcèx íchaca na yexeraäcü nüxü pecuáxüçèx i guxüma i Tupanachiga rü yexeraäcü nüxü pecuáxüçèx na ñuxäcü nanaxwèxexü na naxcèx pemaxëxü. ¹⁰ Rü ngëmaäcü pexcèx chayumüxë erü chanaxwèxe na meã penangugüxü i tacü nixí i aixcüma mexü i Tupanapëxewa na penaxüxüçèx i ngëma. Rü chanaxwèxe na aixcüma namexü i perü maxü na taxucèxma tacüçèx Tupana pexna çaxüçèx i ngëxguma ínanguxgu ya Cristu. ¹¹ Rü naxcèx íchaca na Ngechuchu ya Cristu pexü narüngüxëëxü na aixcüma namexüçèx i perü maxü rü aixcüma penaxüxüçèx i ngëma Tupanapëxewa mexü na ngëmaäcü meã pemaxëäcüma Tupanaxü picuèxüügüxüçèx.

*Chauxcèx rü Cristuarü ngúchaŭ na chaxüxcèx
nixĩ i chamaxüxü*

¹² Pa Chaueneëgüx, rü chanaxwèxe i nüxü pecuèx rü guxüma i ngëma choxü üpetüxü, rü aixcüma ngëmaäcü choxü naxüpetü na yexeraäcü natachigaxüxcèx i Tupanaärü ore i mexü. ¹³ Rü ñuxma i núma rü guxüma i churaragü i äëxgacüpataarü dauruügü rü guxüma i togü rü ta nüxü nacuèxgü na chapoxcuxü naxcèx na Cristuarü duüxü chiixü. ¹⁴ Rü ñuxma na chapoxcuxü rü muxüma i taeneëgü i yaxögüxü rü tama namuëëäcüma nüxü nangúchaŭ na nüxü yaxugüexü i Tupanaärü ore i mexü. Rü yexeraäcü tórü Coriaxü nayaxögü. ¹⁵ Rü aixcüma nixĩ i ñuxre i duüxügü rü togüxü na yaxäüxächixëëxüxcèxmare nüxü nixugüexü i Cristuchiga, erü togüxü narüyexerachaŭ. Natürü nangëxma i togü i duüxügü i aixcüma mexügu naxĩnüëäcüma meä nüxü ixugüexü i ngëma ore. ¹⁶ Rü ñuxre i duüxügü rü Cristuchigaxü nixugüe erü choxü nangechaügü rü nüxü nacuèxgü na Tupana nuxma choxü muxü na íchanapoxüxcèx i norü ore i mexü. ¹⁷ Natürü nangëxma i togü i noxrütama ngúchaüxcèx daugüxü rü ngëmacèx nüxü ixugüexü i ngëma ore. Rü nümagü rü tama mexügu narüxĩnüë, natürü naxcèx nadaugü na yexeraäcü choxü naguxchaxëëgüãxü i ñuxma na chapoxcuxü. ¹⁸⁻¹⁹ Natürü nüetama nixĩ ega woo ngëmaäcü yixĩgu. Erü woo mexü i norü ngúchaümaä yixĩgu rü ëxna tama, natürü Cristuchigaxü nixugüe. Rü ngëma rü wüxi i taäë nixĩ i chauxcèx. Rü guxügutáma chataäëëcha erü nüxü chacuèx rü guxüma i

ngẽma rü chorü mexüçèx tá nixĩ erü chauxcèx
 peyumüxëgü rü choxü narüngüxëẽ i Tupanaãẽ
 i Üünexü i Ngechuchu ya Cristuxü rüngüxëẽxü.
²⁰ Rü ngẽma poraãcü chanaxwèxexü nixĩ na
 taguma tacü rü chixexü chaxüxü na taxucèxma
 chaugücèx chaxãnexüçèx. Rü chanaxwèxe i
 guxüguma íchamemare na guxãpëxewa tama
 chamuũãcüma Cristuchigaxü chixuxü. Rü ñuxma
 na chamaxüxü rü woo chayuxgu rü chanaxwae i
 guxüguma aixrügumarüütama chaugagu Cristuxü
 nicuèxüügü i duüxügü. ²¹ Erü chauxcèx rü
 Cristuarü ngüchaü na chaxüxüçèx nixĩ i na
 chamaxüxü. Natürü ngëxguma chayuxgux rü
 ngẽma rü ta name, erü Cristuxütawa tá changëxma
 i ngëxguma. ²² Natürü tama nüxü chacuèx i tacü
 nixĩ i rümemaëxü i chauxcèx, ngẽma na chayuxü rü
 ëxna na chamaxüxü.. Erü ñuxma na chamaxüxü
 rü choxü natauxcha na chanaxüxü i tórü Coriarü
 puracü. ²³ Rü ngẽmacèx tama nüxü chacuèx na
 tacü yĩxü i chauxcèx rümemaëxü i ngẽma taxrewa.
 Erü ñuxguacü rü chanaxwèxe na chayuxü na
 Cristuxütawa changëxmaxüçèx. Rü ngẽma nixĩ i
 aixcüma yexera rümemaëxü i chauxcèx. ²⁴ Natürü
 i pexcèx rü nagu charüxĩnü rü narümemaë nixĩ
 na ñoma i chaxunemaãtama na chamaxüxü
 na ngẽmaãcü pexü charüngüxëẽxüçèx. ²⁵ Rü
 ñuxma na aixcüma meã nüxü chacuáxü na
 pechoxwèxexü, rü ngẽmawa nüxü chacuèx
 na tãütama paxa chayuxü. Rü ngẽmaãcü tá
 chamaxãma na pexü charüngüxëẽxüçèx na
 yexeraãcü Cristucèx pemaxëxüçèx rü yexeraãcü
 taãëãcüma nüxü peyaxögüxüçèx. ²⁶ Rü ngẽmaãcü
 wena táxarü petanüwa changëxma. Rü ngëxguma

wena choxũ pedaugũgu rũ aixcũma tá petaãẽgũ erũ tá pexũ nangẽxma na tacũcẽx Ngechuchu ya Cristuxũ picuẽxũũgũxũ. ²⁷ Rũ ngẽma guxũãrũ yexera rũmemaẽxũ nixĩ na naxcẽx pedauxũ na meã pemaxẽxũ, ngẽma Cristuarũ ore pemaã nũxũ ixuxũrũũ. Rũ ngẽxguma petanũwa chaxũxgu rũ ẽxna woo tama ngẽma chaxũxgu, natũrũ nũxũ chaxĩnũchaũ na guxãma wũxigu pegũ peporaexẽẽxũ na taguma nũxũ perũchaxũcẽx na aixcũma peyaxõgũxũ, rũ ngẽmaãcũ Tupanaãxũ pepuracũxũ na yexeraãcũ yaxũchigũxũcẽx i norũ ore i mexũ. ²⁸ Rũ ngẽmacẽx penaxwẽxe i tama texẽxũ pemuũẽãcũma nũxũ pixugũama i ngẽma ore. Rũ ngẽma na tama nũxũ pemuũẽxũ rũ ngẽma rũ wũxi i cuẽxruũ tá nixĩ nũxũ i perũ uwanũgũ. Rũ ngẽmawa tá nũxũ nacuẽxgũ na poxcuwa tá naxĩxũ i nũmagũ natũrũ pema rũ tá maxũwa na pexĩxũ. Rũ Tupana tá nixĩ ya pexũ rũngũxẽẽcũ na tama nũxũ pemuũẽxũcẽx i ngẽma perũ uwanũgũ. ²⁹ Rũ Tupanaga nixĩ na Cristuaxũ peyaxõgũxũ. Rũ ngẽxgumarũũ ta naga nixĩ na Cristucẽx ngũxũ pingegũxũ. Rũ ngẽma rũ wũxi i ngũxẽẽ nixĩ i pexna naxãxũ ya Tupana. ³⁰ Pema rũ choma rũ wũxigu Tupanaãrũ puracũwa tangẽxmagũ, rũ tanaxũama i ngẽma puracũ ega woo texẽ tũxũ naguxchaxẽẽgux. Rũ ũpa rũ marũ choxũ pedau na ñuxãcũ meã chanaxũxũ i ngẽma puracũ, rũ ñuxma rũ ta nũxũ picuáchiga na ñuxãcũ chanaxũamaxũ woo namu i chorũ guxchaxũgũ.

2

Cristu rũ ñoma taxuũma yĩxũrũũ nũgũ nixĩxẽẽ

*rü yemacèx ga Tupana rü guxũãrũ ãëxgacũxũ
nayaixẽẽ*

¹ Rü dücax, Pa Chaueneëgũx, rü ñuxma na Cristuarũ duũxũgũ pixĩgũxũ, ¿rũ aixcũma yĩxũ i nũma pexũ nataãëxẽẽxũ? ¿Rũ aixcũma yĩxũ i petaãëgũxũ erũ nũma pexũ nangechaũ? ¿Rũ aixcũma yĩxũ i Tupanaãë i Üünexũ pexũtawa ngẽxmaxũ? ¿Rũ aixcũma yĩxũ i pegũ pengechaũgũxũ rü pegũxũ pengechaũtũmũgũxũ? ² Rü ngẽxguma chi ngẽmaãcũ yixĩgu, rü chanaxwèxe i guxãma wũxigu perũxĩnũë, rü aixcũma guxãma pegũ pengechaũgũ, rü aixcũma guxãma ñoma wũxitama piĩxũrũ na yĩxũ i peãë, rü guxãma wũxitama i ngũchaũcèx pedau. Rü ngẽxguma ngẽmaãcũ pemaxëgu rü wũxi i chorũ taãë tá nixĩ. ³ Rü tama name na togũarũ yexera pegũ pixĩgũxẽẽxũ rü pegũ picuèxũxũgũxũ. Natürũ narũmemae nixĩ i nagu perũxĩnũëxũ na ngema togũ rü perũ yexera nũxũ nacuègũxũ. ⁴ ¿Rũ tama pegũguxicatama perũxĩnũë, natürũ pegũ peporaexẽẽ na togũxũ perũngũxẽëgũxũcèx! ⁵ Rü name nixĩ ga yema Ngechuchu ya Cristu nagu rüxĩnũxũgu na perũxĩnũëxũ i pemax. ⁶ Yerũ nũma rü woo ga Tupanaxũchi na yĩxũ, natürũ tama nũgũ nicuèxũxũ na Tupana yixĩxũ. ⁷⁻⁸ Rü yemacèx yéma nanatèx ga norũ mexũgũ ga daxũgũxũ ga naãnewa. Rü wũxi i duũxũ i togũaxũ puracũxũrũ nũgũ nixĩxẽẽ. Rü ñoma wũxi i duũxũrũ ñoma ga naãnegu nabu. Rü yexguma marũ duũxũ yixĩgu ga nũmax, rü ñoma taxuũma yĩxũrũ nũgũ nixĩxẽẽ. Rü Tupanaga naxĩnũ, rü yemaãcũ curuchagu nayu woo wũxi ga ãnexũchi na yĩxũ

ga yema. ⁹ Rŭ yemacèx ga Tupana rŭ guxŭétŭwa nanangexmaxêê rŭ nayangucuchixêê na guxŭma i âêxgacŭgŭétŭwa nangêxmaxŭcèx. ¹⁰ Rŭ yemaâcŭ nanaxŭ ga Tupana na Ngechuchupêxegu tacaxăpŭxŭgŭxŭcèx rŭ nŭxŭ ticuèxŭŭgŭxŭcèx ya guxăma ya texé ya daxŭguxŭ i naănewa ngêxmagŭxe, rŭ guxăma i űoma i naănewa ngêxmagŭxe, rŭ guxăma ya texé ya marŭ yuexe. ¹¹ Rŭ yemaâcŭ Tupana âêxgacŭxŭ nayaxŭêê na guxăma nŭxŭ ixuxŭcèx na tŭrŭ Cori yŭxŭ ya Ngechuchu ya Cristu rŭ ngêmaâcŭ nŭxŭ icuèxŭŭgŭxŭcèx ya Tanatŭ ya Tupana.

Cristuarŭ duŭxŭgŭ rŭ űoma omŭgŭrŭŭ nixŭgŭ i natanŭwa i ngêma duŭxŭgŭ i tama yaxŭgŭxŭ

¹² Rŭ űuxma na nŭxŭ pecuăxŭ na űuxăcŭ Nanatŭga naxŭnŭxŭ ga Cristu, rŭ chanaxwèxe i chauga pexŭnŭê, Pa Chaueneêgŭ ya Pexŭ Changechaŭgŭxe. Rŭ yéma petanŭwa chayexmagu chauga na pexŭnŭêxŭârŭ yexera chanaxwèxe i chauga pexŭnŭê i űuxma na tama petanŭwa changêxmaxŭ. Rŭ chanaxwèxe i Tupanaxŭ pemuŭêăcŭma naxcèx pedaugŭama i perŭ maxŭ i taguma gŭxŭ. ¹³ Erŭ Tupana nixŭ ya perŭ maxŭwa puracŭcŭ na mexŭgu perŭxŭnŭexŭcèx. Rŭ nŭma nixŭ i pexŭ nangŭxêêxŭ na naga pexŭnŭêxŭcèx rŭ peyanguxêêxŭcèx i ngema norŭ ngŭchaxŭ. ¹⁴ ¡Rŭ guxŭma i ngema Tupanacèx pexŭxŭwa rŭ tama name i oŭcŭ penaxŭ rŭ pegŭ naxcèx pechoxŭgagŭ! ¹⁵⁻¹⁶ Rŭ name i ngêmaâcŭ meă pemaxê na taxúema tacŭ rŭ chixexŭxŭ pewa iyangauxŭcèx. Rŭ penaxwèxe i mexŭ i Tupanaxăcŭgŭ pixŭgŭ i natanŭwa i ngêma

duŭxŭgŭ i chixexŭ rŭ chixeãĕgŭmarexŭ. Rŭ ngĕxguma ngĕma duŭxŭgŭmaã nŭxŭ pixugŭyane i ngĕma ore i mexŭ i tŭxŭ maxĕxĕxŭ, rŭ yoxni natanŭwa rŭ ñoma woramacurigŭ ya ĕānexŭwa ibáixgŭcŭrŭŭ tá pixĭgŭ. Rŭ ngĕmaãcŭ i ngĕxguma wena núma naxŭxgu ya Cristu rŭ poraãcŭ tá pemaã chataã erŭ tá nŭxŭ chadau na tama natŭcĕxmamare yĭxŭ ga yema puracŭ ga petanŭwa chaxŭxŭ. ¹⁷ Rŭ ngĕma ñŭxma na meã peyaxŭgŭxŭ, rŭ ngĕma nixĭ i perŭ āmare i Tupanana pexāxŭ. Rŭ ngĕma na meã yanguxŭcĕx i ngĕma perŭ āmare i Tupanapĕxewa, rŭ choma rŭ íchamemare na Tupanacĕx ichanaxāxŭ i chorŭ maxŭ rŭ chayuxŭ. Rŭ ngĕmacĕx woo chayuxgu rŭ wŭxi i taã tá nixĭ i chauxcĕx. Rŭ chanaxwĕxe i pemagŭ rŭ ta ngĕmacĕx wŭxigu chomaã petaãĕgŭ. ¹⁸ Rŭ ngĕmacĕx ega ngĕma ore i mexŭcĕx chayuxgux, rŭ tama name na pengechaŭgŭxŭ natŭrŭ chanaxwĕxe na wŭxigu chomaã petaãĕgŭxŭ.

Timutéu rŭ Epaporu- dítuchiga

¹⁹ Rŭ ngĕxguma tŕrŭ Cori ya Ngechuchu naxwĕxegu rŭ paxa petanŭwa chanamuega ya taeneĕ ya Timutéu na pexŭ na íyadauxŭcĕx rŭ chataãĕxŭcĕx i ngĕxguma núma nangeāgu i pechiga. ²⁰ Rŭ aixcŭma nataxuma i to i chorŭ ngŭxĕĕruŭ i choma nagu charŭxĭnŭxŭgu rŭxĭnŭxŭ, rŭ Timutéuxicatama nixĭ. Rŭ nataxuma i to i naxrŭŭ aixcŭma pegu rŭxĭnŭxŭ rŭ pexŭ rŭngŭxĕĕchaŭxŭ. ²¹ Erŭ guxŭma i togŭ rŭ naxcĕx nadaugŭ i noxrŭtama ngŭchaŭgŭ, rŭ tama aixcŭma nagu narŭxĭnŭĕ i ngĕma Ngechuchu ya Cristuarŭ ngŭchaŭ. ²² Natŭrŭ i pema rŭ

marü nüxü pecuèx na ñuxäcü meã namaxüxü i Timutéu, rü ñuxäcü choxü nangüxëëxü i Tupanaärü orearü uchigawa, ñoma wüxi i buxü i nanatüxü rüngüxëëxürü. ²³ Rü ngëmacèx i ngëxguma nüxü chacuèxgu na ñuxäcü tá choxü na naxüpetüxü i núma, rü ñuxüchi ngëma petanüwa chanamuxchaü i Timutéu na pexü íyadauxüçèx. ²⁴ Rü ngëxgumarüü ta nagu charüxînü rü tórü Cori rü aixcüma tá choxü narüngüxëë na chomatama ngëma petanüwa íchayadauxüçèx. ²⁵ Rü ngëxgumarüü ta chauxcèx name nixî i ngëma petanüwa chanamuxü i taeneë i Epaporudítu. Rü nüma nixî ga pematama chauxcèx núma penamuxü na choxü nangüxëëxüçèx. Rü nüma rü chomücü nixî i Tupanaärü puracüwa, rü poraäcü choxü narüngüxëë i Tupanaärü orearü uwa. ²⁶ Rü poraäcü nüxü nangüchaü na pexü íyadauxü i guxäma i pemax. Rü poraäcü naxoegaãë, yerü pema rü nüxü pecuáchiga ga na yadaawexü ga nümax. ²⁷ Rü aixcüma nixî ga na yadaawexü, rü wixguxüchi taèx nayu. Natürü Tupanaäxü nangechaütümüü rü choma rü ta nüxü changechaütümüü, rü yemacèx naxcèx nayataanexëë na tama yexeraäcü changechaüxüçèx. ²⁸ Rü ngëmacèx rü yexeraäcü chanaxwèxe na paxa petanüwa chanamuxü i Epaporudítu, na pema rü petaãëgüxüçèx i ngëxguma wena nüxü pedaugügu. Rü ngëxguma i choma rü tá ta chataãë i ngëxguma nüxü chacuèxgu na petanüwa nangëxmaxü na pexü nangüxëëxüçèx. ²⁹ Rü chanaxwèxe i tórü Coriéragu petaãëgüäcüma meã penayaxu erü

peeneẽ nixĩ. Rũ name nixĩ i nüxũ pengechaũgũ i guxũma i ngẽma duũxũgũ i Epaporudíturũũ ixĩgũxũ. ³⁰ Yerũ nüma ga Epaporudítu rũ yema na poraãcũ nawa napuracũxũ ga Cristuarũ puracũ, rũ yemacèx wixguxũchi taèx nayu. Rũ ãũcũmaxũwa nũgũ nayexmaxẽẽ na pechicũũ choxũ nangũxẽẽxũcèx.

3

Ngẽma na Cristuxũ icuáxũ rũ ngẽma nixĩ i guxũãrũ yexera rũmemaẽxũ

¹ Rũ ñuxma Pa Chaueneẽgũx, rũ chanaxwèxe i petaãẽgũ erũ tórũ Coriarũ duũxũgũ pixĩgũ. Rũ yema ore ga noxri pexcèx chaxũmatũxũ rũ tama choxũ nawèxtũmũũ na wena pexcèx chanaxũmatũxũ erũ aixcũma pexũ name i ngẽma ore. ² ¡Rũ pegũna pedèux nüxna i ngẽma duũxũgũ i chixrĩ maxẽxũ rũ chixexũmaã pexũ ixucuxẽgũxũ! Rũ nümagũ nixĩ i nüxũ yaxugũexũ rũ ngẽxguma tama yigũ íwiechèxmüpẽxechiraũgu, rũ taxucürũwama Tupanapẽxewa time. ³ Natürũ yíxema aixcũma Tupanapẽxewa imexẽ, rũ yixema tixĩgũ. Rũ Tupanaxũ tikuèxũũgũ i Naãe i Üünexũãrũ ngũxẽemaã. Rũ tataãẽgũ erũ Ngechuchu ya Cristuarũ duũxũgũ tixĩgũ. Rũ tama tayaxõgũ na ngẽma yigũ íwiechèxmüpẽxechiraũxũcèx Tupanapẽxewa imexũ. ⁴ Rũ choma chi waxi nixĩ i guxũ i togũarũ yexera chayaxõxũ i ngẽma wiechèxmüpẽxechiraũchiga. Rũ tataxu chima ya togue ya texé chauxrũũ yaxõxẽ i ngẽmachiga. ⁵ Yerũ yexguma 8 ga ngunexũ chauétũ yixĩgu ga

na chabuxũ, rü choxũ ínawiechẽxmüpẽxechiraũgũ, erũ Yudíu chixĩ. Rü Beyamítanũxũ chixĩ. Rü chaunatũ rü chaué rü Yudíugũ tixĩgũ, rü ngẽmacẽx i choma rü Yudíuxũchi chixĩ. Rü choma rü Parichéuchirẽx chixĩ, rü pema nũxũ pecuẽx rü ngẽma Parichéugũ rü meãma nanaxaure i Tupanaãrũ mugũ ga Moĩché ũmatũxũ. ⁶ Rü yema na meã chayanguxẽẽchaũxũcẽx ga yema mugũ ga Moĩché ũmatũxũ, rü yemacẽx nawe chingẽchigũ ga yema duũxũgũ ga Ngechuchuaxũ yaxõgũxũ. Rü yema na aixcũma meã chanaxaurexũcẽx ga yema mugũ ga Moĩché ũmatũxũ, rü yemacẽx taxucürũwama texé chauchigaxũ tixu ga tama na chaxaurexũ. ⁷ Natürũ guxũma ga yema ũpa chauxcẽx mexũ, rü ñuxma rü taxuwama choxũ name erũ marũ íchanatẽx na Cristuaxũxĩcatama chayaxõxũcẽx. ⁸ Rü ñuxma na Ngechuchu ya Cristu ya chorũ Corixũ na chacuáxũ, rü chauxcẽx rü guxũma ga yema ũpa nagu chixũxũ rü taxuwama name, erũ ngẽma na Cristuxũ na chacuáxũ rü guxũãrũ yexera narũmemaẽ. Rü guxũma ga yema mugũ ga noxri nagu chixũxũ rü marũ nũxũ charũxo na Cristuwe charũxũxũcẽx. Rü chauxcẽx rü ñoma guxchirerũ nixĩ ga yema ũpa nagu chixũxũ ega Cristumaã nũgũ chananguxgu. ⁹ Rü yemaãcü nũxũ charũxo ga guxũma nagagu ga yema na Cristuarũ duũxũ na chiĩxũcẽx. Rü ñuxma rü Tupanapẽxewa chame erũ Cristuaxũ chayaxõ. Rü tama ngẽma na chamecũmaxũcẽx rü ẽxna mugũ chaxaurexũcẽx nixĩ na chamexũ i napẽxewa. Natürũ ngẽma na Cristuaxũ chayaxõxũcẽx nixĩ i nũgũcẽx choxũ namexẽẽxũ ya Tupana. ¹⁰⁻¹¹ Rü ngẽma ñuxma

chanaxwèxexŭ nixĩ na aixcŭma Cristuxŭ chacuáxŭ rŭ chowa na nangẽxmaxŭ i ngẽma pora ga wena Cristuxŭ írŭdaxẽẽxŭ i ñuxma nüxŭ ngẽxmaxŭ. Rŭ yema ngúxŭ na yangexŭ ga nüma rŭ na nayuxŭ rŭ ngẽxgumarŭŭtama chanaxwèxe i íchamemare na naxcèx ngúxŭ chingexŭ rŭ naxcèx chayuxŭ na yixcama choma rŭ ta yuwa ícharŭdaxŭcèx.

Pauru naxcèx nadau na Cristucèx namaxŭxŭ ñuxmatáta Tupanax-ŭtawa nangu

¹² Rŭ ñuxma na ngẽma ñachaxŭ pemaã rŭ tama chanaxwèxe i nagu perŭxĩnüẽ na guxŭxŭ chacuáxŭ i Cristuchiga, rŭ ẽxna guxŭwama na chamexŭ. Natŭrŭ guxŭ i ngunexŭgu rŭ naxcèx chadauama na Ngechuchu ya Cristuarŭ ngúchaŭ na chaxŭxŭcèx, yerŭ yemacèx nixĩ ga nüma ga chauxcèx nadauxŭ ga noxrix. ¹³ Pa Chaueneẽgŭx, pemaã nüxŭ chixu rŭ chomatama meãma nüxŭ chacuèx rŭ ñuxma rŭ ta tautama nawa changu i ngẽma naxcèx chadauxŭ. Natŭrŭ i ñuxma rŭ marŭ nüxŭ icharŭngŭma i guxŭma ga yema noxri nagu chixŭxŭ. Rŭ ñuxma rŭ chaugŭ chaporaxẽẽ na aixcŭma Cristucèx na chamaxŭxŭ na nawa changuxŭcèx i ngẽma maxŭ i chopẽxewaama ngẽxmaxŭ. ¹⁴ Rŭ ngẽmacèx i ñuxma rŭ naxcèx chadau na aixcŭma Cristucèx chamaxŭxŭ ñuxmatáta Tupanaxŭtawa changu. Erŭ chanayauxchaŭ i ngẽma ãmare i nüma daxŭguxŭ i naãnewa naxcèx taxcèx nangemaxŭ i yixema na Ngechuchu ya Cristuarŭ duŭxŭgŭ ixĩgŭxŭ. ¹⁵ Rŭ guxãma i yixema na aixcŭma Cristuaxŭ yaxŭgŭxŭ, rŭ name nixĩ i ngẽmaãcŭ nagu tarŭxĩnüẽ. Natŭrŭ ngẽxguma chi texé i petanŭwa toguama tarŭxĩnügu, rŭ Tupana tá

tüxü nüxü nacuèxëë i ngëma nüma nanaxwèxexü na nüxü tacuáxü. ¹⁶ Rü ngëma inaxwèxexü nixi na aixcüma naga ixinüëechaxü rü meäma naga ixixü i ngëma ore i marü nüxü icuáxü. ¹⁷ Pa Chaueneëgüx, chanaxwëxe i chauxrüü naga pexi i ngëma pexü nüxü chadauxëëxü na namexü. ¡Rü penangugü na ñuxäcü meä namaxëxü i ngëma togü i duüxügü i toma tamaxëxüäcüma maxëxü! ¹⁸ Rü marü muëxpüxcüna pemaä nüxü chixu, rü ñuxma rü changechaüäcüma rü chaxauxäcüma wena pemaä nüxü chixu rü nangëxma i muxüma i duüxügü i Cristuarü uwanürüüäcüma maxëxü. Rü nümagü rü tama nüxü nacuëxgüchaü na Cristu curuchagu naxcèx yuxü. ¹⁹ Natürü ngëma duüxügü rü tá düxwa Tupana nanapoxcue. Rü ngëma naxüneärü ngüchaü nixi i namaä natupanaäxü. Rü woo nüxü nacuëxchirëx na wüxi i äne na yixü i ngëma chixexü natürü namaä nataäëgüama. Rü ñoma i naäneärü ngëmaxüguxicatama narüxinüë. ²⁰ Natürü i yixema rü daxüguxü i naänewa tüxü nangëxma i tachica. Rü ítananguxëë na daxüguxü i naänewa taxcèx ne naxüxü ya tórü Cori ya Ngechuchu ya Cristu ya tórü Maxëxëëruü. ²¹ Rü ñaä taxüne i yuxwèxexü rü nüma ya Cristu tá nanaxüchicüü na naxüne i mexëchixürüü yixücèx. Rü ngëma norü pora i namaä guxüetüwa nangëxmaxü, rü ngëmamaätama tá nanaxüchicüü i taxüne na noxrürüü yixücèx.

4

Ñuxma na tórü Coriarü ixigüxü rü name nixi na guxüguma namaä itaäëgüxü

¹ Pa Chaueneëgüx, rü pexü changechaxü rü poraãcü pexü íchayadauxchaxü. Rü ngêma pemaã nüxü chixuxü rüü chanaxwêxe i meã tórü Coricèx pemaxê erü pema nixî i chorü taãê rü chorü âmare i Tupana choxna âxü pixîgüxü.

² Rü nüxü chacèexü i taeyèxgü i Ebódia rü Chitique na nügümaã nangüxmüêxücèx, erü nümagü rü tórü Corixacügü nixîgü.

³ Rü cumax, Pa Chomücü ya Mecü i Wüxigu Tupanaärü Puracüwa Chomaã Puracücüx, rü cuxna naxcèx chaca na nüxü curüngüxêxücèx i ngêma taxre i taeyèxgü, erü nümagü rü wüxigu chomaã rü Cremetemaã rü ngêma togü i chomücügü i Tupanaärü poperawa marü ngoxégagüxümaã napuracüe i Tupanaärü orearü uwa.

⁴ Rü ñuxma na tórü Coriarü pixîgüxü, Pa Chaueneëgüx, rü name nixî i guxüguma namaã petaãëgü. Rü wena pemaã nüxü chixu, rü ¡petaãëgü!

⁵ Rü chanaxwêxe i meã pemaxê na guxüma i duüxügü pexü nacüèxgüxücèx na aixcüma mexü i duüxügü na pixîgüxü. ¡Rü nüxna pecüèxâchie na tórü Cori rü paxa tá nataeguxü na núma naxüxü!

⁶ ¡Rü taxucèxma penaxixâchiãëgü! ¡Rü Tupanamaã nüxü pixu i perü yumüxêwa i guxüma i tacü i pexü ngupetüxü! ¡Rü naxcèx ípeca rü moxê nüxna pexã!

⁷ Rü ngêmaãcü i nüma ya Tupana rü tá pexü nataãêxêê namaã i wüxi i taãê i mexêchixü i guxüma i taãê i nüxü icuáxüärü yexera mexêchixü. Rü ñuxma na Ngechuchu ya Cristuarü duüxügü pixîgüxü, rü ngêma taãê i Tupana pexna âxü rü tá nüxna pexü ínapoxü i ngêma chixexü i nagu perüxînüêchaxü.

Name nixî i nagu tarüxîñüê i guxüma i tacü i

aixcūma mexũ ixĩxũ

⁸ Rũ ñuxma Pa Chaueneẽgũx, rũ name nixĩ i nagu perũxĩnũẽ i guxũma i ngẽma ore i aixcūma ixĩxũ, rũ guxũma i ngẽma nacūma i taxucũrũwama texé chixri nachiga idexaxũ. Rũ name nixĩ i nagu perũxĩnũẽ i guxũma i ngẽma ore i aixcūma meã iwéxũ rũ guxũma i ngẽma Tupanapẽxewa mexũ, rũ guxũma i ngẽma mexũ i duũxũgũ namaã taãẽxũ, rũ guxũma i ngẽma mexũ i Tupanaxũ naxcèx icuèxũũxũgũxũ. Rũ name nixĩ i ngẽmagu perũxĩnũẽ. ⁹ Rũ chanaxwèxe i aixcūma penaxũ i ngẽma pexũ changúexẽẽxũ, rũ ngẽma pexũ namaã chixucũxẽgũxũ, rũ ngẽma chauxũtawa nũxũ pexĩnũẽxũ, rũ ngẽma chauxũtawa nũxũ pedauxũ na chanaxũxũ. Rũ ngẽxguma ngẽmaãcũ pemaxẽgu rũ pemaã tá inarũxãũx ya Tupana ya tamaã irũngũxmücũ rũ tũxũ taãẽxẽẽcũ.

Yema Piripucũāx ga yaxõgũxũ rũ dĩẽrumaã Pauruxũ narũngũxẽẽgũ

¹⁰ Rũ ñuxma na chorũ Coriarũ chiĩxũ, rũ poraãcũ chataãẽ erũ wenaxãrũ choxna pecuèxãchie rũ choxũ perũngũxẽẽ. Rũ choma nũxũ chacuèx rũ pema rũ guxũguma choxũ perũngũxẽẽchaũ, natũrũ taguma pexũ natauxcha ga na penaxũxũ ga yema. ¹¹ Rũ tama ngẽma na tacũ choxũ taxuxũcèx nixĩ i pemaã nũxũ chixuxũ i ngẽmachiga. Erũ choma rũ marũ chomaã nixũ na namaã chataãẽxũ i ngẽma choxũ ngẽxmaxũ. ¹² Rũ nũxũ chacuèx na ñuxãcũ na yĩĩxũ ega guxũ choxũ tauygux, rũ nũxũ chacuèx na ñuxãcũ na yĩĩxũ ega choxũ namuxũchixgu. Rũ marũ chomaã nixũ na namaã chataãẽxũ i ngẽma choxũ ngẽxmaxũ woo changxpütũwegu,

rü ěxna woo chataiyaxgu, rü ěxna woo choxŭ
 namuxŭchixgu rü ěxna woo choxŭ natauxguma.
¹³ Rü Cristu nixĩ ya choxŭ poraxĕĕcŭ, rü ngĕmacĕx
 chomaã nanguxŭ na chanaxŭxŭ i guxŭma
 i ngĕma Tupana naxwĕxexŭ na chanaxŭxŭ.
¹⁴ Natŭrŭ ga pema rü wŭxi ga mexŭ choxŭ
 pexŭgŭ ga yexguma guxchaxŭwa chayexmagu
 rü choxŭ perŭngŭxĕĕ. ¹⁵ Rü pema, Pa Yaxŏgŭxŭ i
 Piripucŭăx, rü meãma nŭxŭ pecuĕx rü yexguma
 noxri Machedŏniãnewa nŭxŭ chixuxgu ga
 Tupanaãrŭ ore, rü yexguma yĕma íchaxŭxŭgu, rü
 pexicatama nixĩ ga ãmare choxna pexãxŭ naxcĕx
 ga yema ngŭxĕĕ ga chauxŭtawa peyaxuxŭ. ¹⁶ Rü
 yexguma Techarŏnicaarŭ iãnewa chayexmayane,
 rü pema rü yĕma chauxcĕx penamugŭ ga perŭ
 ãmare na choxŭ perŭngŭxĕĕgŭxŭcĕx. Rü tama
 nixĩ ga yexgumaríca choxŭ perŭngŭxĕĕxŭ. ¹⁷ Rü
 woo perŭ ãmaremaã chataãĕ, natŭrŭ yexeraãcŭ
 chataãĕ erŭ ngĕma choxŭ na perŭngŭxĕĕgŭxŭcĕx
 rü Tupana tá ãmare pexna naxã. ¹⁸ Rü ñuxma
 rü marŭ choxŭ nangĕxma i guxŭma i țacŭ i
 chanaxwĕxexŭ, rü aixcŭma ngĕmaãrŭ yexera
 choxŭ nangĕxma. Rü ñuxma na Eporudítu
 núma nangexŭ i perŭ ãmare, rü taxuŭma choxŭ
 nataxu. Rü ngĕma perŭ ãmare i chauxcĕx núma
 pemuxŭ, rü Tupanapĕxewa rü ñoma wŭxi i
 pumara i yixixŭrŭxŭ nixĩ, rü nŭma rü poraãcŭ
 namaã nataãĕ. ¹⁹ Rü ngĕmacĕx ya chorŭ Tupana
 rü norŭ ngĕmaxŭgŭ i mexĕchixŭwa tá pexna
 nanaxã i guxŭma i țacŭ i pexŭ taxuxŭ. Rü
 ngĕmaãcŭ tá nanaxŭ erŭ Ngechuchu ya Cristuarŭ
 duŭxŭgŭ pixĩgŭ. ²⁰ Rü name nixĩ i guxŭguma nŭxŭ

ticuèxüügü ya Tanatü ya Tupana. Rü ngẽmaãcü yĩ.

Pauru nanaguxẽẽ ga norü popera rü wenaxãrü yema duũxügxü narümoxe

²¹ Rü chanaxwèxe i chauégagu nüxü perümoxeü i guxüma i taeneëgü i Ngechuchu ya Cristuaxü yaxõgxü. Rü ngëxgumarü ta pexü narümoxeü i ngẽma taeneëgü i chauxütawa ngëxmagüxü. ²² Rü ngëxgumarü ta pexü narümoxeü i guxüma i taeneëgü i núma Dumawa ngëxmagüxü. Rü ngẽma yexera pexü rümoxeüxü rü ngẽma nixĩ i taeneëgü i Dumaãrü ãëxgacü ya tacüxü-tawa puracüexü. ²³ Rü chanaxwèxe i tórü Cori ya Ngechuchu ya Cristu pexü narüngüxẽẽ i guxãma i pemax. Rü ngẽmaãcü yĩ.

Rü nuãma pexna,
Pauru

**Tupanaarü Ore i Tórü Cori ya Ngechuchu ya
Cristuchiga
New Testament in Ticuna (PE:tca:Ticuna)**

copyright © 2008 Wycliffe Bible Translators, Inc.

Language: Ticuna

Translation by: Wycliffe Bible Translators, Inc.

Ticuna

tca

Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Ticuna

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 22 Feb 2024 from source files dated 29 Jan 2022

9d5dc22a-30be-5d26-85a9-76047f4c89e6